

LA CARTA DEL APOSTOL SAN PABLO A FILEMON

Pablo embesa Filemón je

¹Se rei Pablo. Setarō ji aĩ a. Mbia que setarō Jesucristo riĩ nda. Timoteo rese aico ā mbesa mbesa ndeje a, Filemón. Uresenda tuchi chō nde re. Jesucristo rimba. ²Ae Jesús quiato ñumunua nua mbei quia ndechuchúaa nae, ũquĩ je abe ureico ā mbesa mbesa a. Apia je abe ureico embesa mbesa a. Arquipo abe je no. Ae que siqui bei urerese ra. Mbia icuā icuā mose ure je Jesús cheē niĩ. ³Sã Dios riqui turã mbei jêje. Sã jêya bei riqui erese. Jesucristo rese abe no.

Filemón Jesús quiato tuchi

⁴Secheē mose Dios je, “gracias” ae bei se quia Dios je nderiĩ co. ⁵Mbia que sembiirandu randu nderese ra. —Filemón ndiqui Jesús icua tuchi co. Co eriqui nyesequa tuchite Jesús rese co. Dios quiato ja rese abe no, i que equia sembiirandu randu nderese ra. ⁶Aico ñee mbeite Dios je nderiĩ co. Ae je ereico Jesús nenei nenei nae, i nda ũquĩ abe Jesús icua tuchi nde rã si. ⁷Aque ereico nyesequa tuchi Jesús quiato ja rese aque. Nyebe seya beite riqui nguiã nderese co. Nde que Jesús erechousei uquia quia Jesús quiato je ra.

Onésimo eisi turã, i Pablo ñee

⁸Cristo chimbaaquiatu aico raque co. Sã ererequa riqui ñee ngũimba je no. Ũquĩ asaã arôte raque ndeje. Asaã eã nda se. ⁹Tacheē mingue chō ndeje. —Mbae esaã seje, tae turã ño ndeje. Ameite se cote. Setarō ji aĩ Jesús riĩ a no. Se rei Pablo. ¹⁰Mbae mo esaã Onésimo je. Seico mose aa cárcel que aico Onésimo mbaaquiatu quiatu Jesús riĩ nda. Jesús quiato riqui co cote. Seririĩ tuchi rã ño eriqui nguiã co cote. Jesús icua

mose co cote. ¹¹Nderimbachõ ño ngue eriqui nguiã nyii. Erequeteã eã jiri que equia erese nyii ra. Aqueteãte quia erese co cote. Nde abe ra erequeteãte erese cote. Siqui turãte ra nande je cote. ¹²Aque amondo quia ndeje aque. Eisi turã mámbii. Sã ereico seisi turãte no. Ûquĩ esaã si ee. ¹³Amondo sereãte raque. Siquichõ ndei nda serese aa chã. Mbae mee mee sacua setarõ ji je ndecutiã. A setarõ ji ñi Jesús cheẽ turã ñi a. ¹⁴Aisi eã nda mingo serese a, nde “eno” iã mose seje. “Eĩ ere chõ”, ae eã nda ndeje. Nde ae chõ eisi turã. Nde ae chõ echeẽ turã ee. Se ae ra arembucheẽ turã eã ee.

¹⁵Uchã ndei que ndesi nyii ra. Siqui bei ra nderese cote reae. ¹⁶Nderimbachõ eã nda cote. Ndequiato chõ nda cote. Nderesenda chõ nda cote. Co aico nyesequate erese co. Nde quiatu ra erechesequa tuchi erese cote. Cristo resenda chõ siqui nguiã co cote. Nderese. ¹⁷Ndequiato tuchi chõ se re. Sã ñi ereico seisi turã turãte no. Eĩ ere si chõ Onésimo isi turã se rã si. ¹⁸Onésimo deber i mose ndeje, cobrar erechĩ nda ee. Seje quiatu cobrar ere. ¹⁹Pablo chõ se re. Seo je chõ aico nguiã co mbesa ndeje a. Onésimo deber i mose ndeje, asibishorõ nda mbae mee ndeje. Mbae que asaã tuchite rei quia ndeje ra. Dios cheẽ ngue asenei tuchite quia ndeje ra. Dios nemingo bei sacua. Nyebe deber ere tuchite raque seje. ²⁰Nyebe Onésimo eisi turã na seje. Ñ nda seya tuchi jiri nderese. Dios abe ra eyate nderese.

²¹—Filemón nda secheẽ mumba eã. Secheẽ ndui si tuchi ra Onésimo isi turã, ae tuchi se quia nderĩ co. ²²Seruacua jendecoquiato ino mámbii. Dios ra sembusẽ mondo, jeñee mbei mose ee reae. Ûquĩ mose ra aso jendea.

Pablo ñee hui bei

²³Epafras saludos mondo quia ndeje aque. Ae tarõ ji ñi serese a. Jesucristo cheẽ ñi. ²⁴Marcos abe saludos mondo quia ndeje aque. Aristarco abe. Demas abe no. Lucas abe no. Ñ ndiqui Dios cheẽ nenei nenei serese ã. ²⁵Sã Jesucristo riqui uturã ndeacuquia bei jėje. Amén.